

Արևելյան Այսրկովկասի թյուրքական ցեղերը ԺԹ դարում

19-րդ դ. երկրորդ կեսին Արևելյան Այսրկովկասի թյուրքական ծագմամբ բնակչության շրջանում ցեղային պատկանելության շեշտումն աստիճանաբար վերանում էր, քանի որ թյուրքախոսները զանգվածաբար քոչվորական կենսակերպից անցում էին կատարում նստակեցության: Ցարական իշխանության պաշտոնական տվյալների համաձայն՝ 19-րդ դ. վերջում Այսրկովկասի «թաթարների» մեծ մասը դարձել էր նստակյաց, իսկ փոքր մասը վարում էր կիսաքոչվորական կյանք²:

Պաշտոնական տվյալներով՝ 1856 թ. Արևելյան Այսրկովկասի զգալի մասը ներառող Շամախիի նահանգի բնակչության միայն 21,3 տոկոսն էր (100 հազ. մարդ) քոչվոր: 1886թ. Բաքվի նահանգում քոչվոր էր բնակչության 7,1 տոկոսը, Ելիզավետպոլի նահանգում՝ 2,8 տոկոսը³:

Այսրկովկասի թյուրքախոս թաթար բնակչությանը նստակյաց դարձնելը Ռուսական կայսրության քաղաքականության գլխավոր նպատակներից էր: Այս քայլը դիտվում էր որպես երկրամասում ռուսական վարչական համակարգն ամրապնդելու կարևոր միջոց. բացի այդ քոչվորական կենսակերպը խոչընդոտում էր Այսրկովկասի տնտեսական զարգացմանը⁴:

19-րդ դարի վերջում հարևան ժողովուրդները, եվրոպացիներն ու ռուսները Այսրկովկասի թյուրքախոսներին հիմնականում անվանում էին թաթարներ, Կովկասի թաթարներ, թուրքեր և այլն⁵:

Երկրամասի թյուրքախոսների շրջանում որպես ընդհանրական ինքնավանում տարածված էր «մահմեդական» եզրույթը, որը դեռ ընթացող էթնոհամախմբման և միասնական էթնանվան բացակայության պայմաններում առաջնային դիրք էր մղում կրոնական պատկանելությունը:

Աստիճանաբար մոռացվող ցեղային անվանումները պահպանվում էին հիմնականում դեռևս քոչվոր կենսակերպ վարողների մոտ, նաև Արևելյան Այսրկովկասի տեղանուններում: Օր.՝ Արևելյան Այսրկովկասի տեղանունների մի մասի դեպքում պահպանվել էին ոչ միայն Կարա-կոյունլու ցեղային միության

¹ Հոդվածը լույս է տեսել «ԳԱՐԴՄԱՆԻ ԵՒ ՇԻՐՎԱՆԻ ՀԱՅՈՒԹՅԱՆ ՊԱՏՄԱՍՇԱԿՈՒԹԱՅԻՆ ԱՎԱՆԴՆԵՐԸ (պատմություն և արդիականություն) Հանրապետական գիտաժողով (Երևան, 29-30 ապրիլի, 2016): ԶԵԿՈՒՅՈՒՄՆԵՐ ԵՒ ԶԵԿՈՒՅՈՒՄՆԵՐԻ ԴՐՈՒՅԹՆԵՐ», ժողովածուում, Երևան, 2016, էջ 33-59:

² Алфавитный список народов, обитающих в Российской Империи, СПб., 1895, с. 69.

³ Народы Кавказа, т. II, Москва 1962, с. 72.

⁴ Հմմ. Народы Кавказа, т. II, с. 72.

⁵ Первая всеобщая перепись населения Российской империи 1897г., Вып.1, СПб., 1897; Число церквей и прихожан православных, армяно_григорианских и магометанских, по сведениям 1884г., - Кавказский календарь на 1887г., с. 222; Свод статистических данных о населении Закавказского края, извлечённых из посемейных списков 1886 года, Кубинский уезд, Тифлис, 1893; Алфавитный список народов, обитающих в Российской Империи, СПб., 1895, с. 68.

առանձին ցեղերի անուններով տեղանուններ, այլև հենց Կարակոյունլու անունով բնակավայրեր: Օր.՝ Նուխիի գավառում 1414 բնակիչ ընդգրկող Կարակոյունլու գյուղական համայնքը⁶ կամ Շամախիի գավառի Կարակոյունլու գյուղական համայնքը 584 անդամով⁷:

Ստորև կփորձենք ներկայացնել այս տարածաշրջանի թյուրքական ծագմամբ բնակչության էթնիկական հիմքը կազմած հիմնական ցեղերի, ցեղամիավորումների (այրում, շահսևան, փադար, բայաթ, շամլու, ալփաուտ, ռումլու, կենգերլի, մուդանլու և այլն) համառոտ պատմությունը, Այրկովկասում հայտնվելու մոտավոր ժամանակը, բնակության վայրերը: Իրանց մի մասի դեպքում պահպանվել են միայն կցկտուր տեղեկություններ, իսկ մեծ մասի պարագայում առկա են ծագման ու Այսրկովկասում հայտնվելու մի քանի վարկածներ:

Արևելյան Այսրկովկասում բնակություն հաստատած թյուրքական նշանակալից ցեղերից է *Փադարը*, որը սերում էր օղուզական Կայ կամ Կայի ցեղից⁸: Կայի ցեղն իր հերթին համարվում է Օղուզից սերող գլխավոր 24 ցեղերից մեկը⁹: Մոնղոլական արշավանքների ժամանակ փադարները Միջին Ասիայից նախ տեղափոխվել են Ատրպատական: 16-րդ դարում իշխանության համար պայքարում նրանք անցել են ղզլբաշների կողմը և Սեֆյան Իրանի քաղաքական կյանքում ակտիվ դերակատարություն ունեցել: Հայտնի է, որ փադարներին Արևելյան Այսրկովկասի հյուսիս-արևմտյան հատվածում բնակեցրել են Սեֆյանները: Իրենց հավատարիմ թյուրքական այս ցեղին բնակեցնելով լեզգիաբնակ շրջաններում՝ Պարսից շահերը ցանկանում էին դրանով հնազանդեցնել լեզգիներին¹⁰: Ժամանակի ընթացքում փադարները տարածվել են ամբողջ Արևելյան Այսրկովկասում:

19-րդ դարում Ջևաթի գավառում (ուեզդում) բնակվում էր փադարների 218 ընտանիք¹¹: 19-րդ դարի վերջին և 20-րդ դարի սկզբին Փադար անունով բնակավայրեր պահպանվել էին Ղուբայի, Գյոքչայի, Ջևաթի, Ադղաշի, Շամախիի, Նուխիի, Արեշի գավառներում¹²: Արեշի գավառի Ղարադաղլի- Փադար կոչվող գյուղական համայնքում

⁶ Свод статистических данных о населении Закавказского края, извлечённых из посемейных списков 1886 года, Нухинский уезд, Тифлис, 1893.

⁷ Свод статистических данных о населении Закавказского края, извлечённых из посемейных списков 1886 года, Шемахинский уезд, Тифлис, 1893.

⁸ Г.Д.Агаев, Данные этнопономии о расселении тюркоязычных племён в Азербайджане XI-XV вв., - В сб.: Этническая ономастик", Институт этнографии им. Н.Миклухо -Маклая АН СССР, Москва, 1984, с. 148; М.Велили (Бахарлы), Этнография Азербайджана, -В сб.: Азербайджан и азербайджанцы в мире, № 2, Народы Азербайджана, Азербайджан 2009; <http://ethnoglobus.az/>.

⁹ Рашид ад- Дин, Сборник летописей, т. I, кн. I, Москва, 1952, с. 88.

¹⁰ М.Велили (Бахарлы), Этнография Азербайджана, <http://ethnoglobus.az/> , История Азербайджана, т. I, Баку, 1958, с. 266. <http://ethnoglobus.az/>.

¹¹ Г.А. Гейбулаев. Топонимия Азербайджана (историко_этнографические обозрение), Баку,1986, с. 30.

¹² Материалы для изучения экономического быта государственных крестьян Закавказского края, том VII, Тифлис, 1887, с. 359; М.Велили (Бахарлы), Этнография Азербайджана, <http://ethnoglobus.az/>

բնակվում էր մոտ 1200 թաթար բնակիչ¹³: Ջեբրայիլի գավառի Փաղար գյուղում 1886թ. դրությամբ ապրում էր 72 մարդ¹⁴: Ջնաթի գավառի Փաղար անունով համայնքում բնակվում էր 1932 մարդ¹⁵: Ղուբայի գավառում Փաղար-Շաբրան անունով բնակավայրն ուներ 152 բնակիչ: Փաղար և Արմուղի- Փաղար գյուղերը միասին ունեին 211 բնակիչ¹⁶: Շամախիի գավառում հիշատակվում է Փաղար- Գյուլմալի համայնքը՝ 546 բնակչով¹⁷:

Այրումների կամ այրումունների ծագումը վերջնականապես բացահայտված չէ: Այսրկովկասում այրումների հայտնվելու վերաբերյալ տարբեր վարկածներ կան, որոնցից յուրաքանչյուրը կապվում է «այրում» բառի ստուգաբանության հետ: Վարկածներից մեկի համաձայն՝ այրումների նախնիները Այսրկովկաս են եկել Փոքր Ասիայից 14-րդ դ. սկզբում, երբ Իլխանների պետության հետ պայքարում կործանվեց Փոքր Ասիայում Իկոնիայի կամ Ռումի սելջուկյան սուլթանությունը: Այս տեսակետի կողմնակից հայտնի ժողովրդագետ պատմաբաններ Իվան Շոպենն ու Մամեդիասան Վելիլին «այրում» էթնանունը ստուգաբանում են որպես նախնական «էլ ռում», որը հետագայում հնչյունափոխվել է¹⁸: Հայտնի է. որ արաբները, հետո նաև սելջուկները Ռում (Հոմ) էին կոչում Բյուզանդիան (Սելջուկյան տիրապետության տակ նրա տարածքների անցնելուց հետո էլ երկար ժամանակ Փոքր Ասիան կոչվում էր Ռում, իսկ այստեղ ձևավորված Իկոնիայի սուլթանությունը՝ Ռումի սուլթանություն): Փոքր Ասիայից Այսրկովկաս՝ ավելի ստույգ Գանձակ և Արցախի տարածք գաղթածներին տեղի ավելի վաղ շրջանի թյուրքախոսները կոչեցին «էլ ռում», որը նշանակում էր «ռումից եկած» կամ «ռումից սերող». այս վարկածի համաձայն՝ հետագայում այրումների մի մասն անցել է Ատրպատական և ստացել շահսևան անունը¹⁹: 19-րդ դարի առաջին կեսի գործիչ Աբասկուլի-աղա Բաքիխանովը ևս այրումների ծագումը կապում է Փոքր Ասիայից բերված թյուրքական ցեղերի հետ, իսկ «այրում» բառը նույնացնում «էլ ռում» անվան հետ²⁰:

Մեկ այլ վարկածի համաձայն էլ՝ այրումների նախնիներն Այսրկովկասի տեղաբնիկներ են: 20-րդ դ. սկզբում այրումներին ու նրանց կենցաղն ուսումնասիրած ժողովրդագետ Բ. Քարաքաշլին նշում է, որ այրումները շատ են տարբերվում

¹³ Свод статистических данных о населении Закавказского края, извлечённых из посемейных списков 1886 года, Арешский уезд, Тифлис, 1893.

¹⁴ Свод статистических данных о населении Закавказского края, извлечённых из посемейных списков 1886 года, Джебраильский уезд, Тифлис, 1893.

¹⁵ Свод статистических данных о населении Закавказского края, извлечённых из посемейных списков 1886 года, Джеватский уезд, Тифлис, 1893.

¹⁶ Свод статистических данных о населении Закавказского края, извлечённых из посемейных списков 1886 года, Кубинский уезд, Тифлис, 1893.

¹⁷ Свод статистических данных о населении Закавказского края, извлечённых из посемейных списков 1886 года, Шемахинский уезд, Тифлис, 1893.

¹⁸ И. Шопен, Исторический памятник состояния Армянской области в эпоху её присоединения к Российской империи, СПб., 1852, с.536; М.В елили (Бахарлы), Этнография Азербайджана, <http://ethnoglobus.az/>.

¹⁹ Նույն տեղում:

²⁰ А. Бакиханов, Гюлистан_и Ирам, Баку, 1991, с. 82_83.

լեռնաշխարհի մնացյալ թուրքերից: Հենվելով այրումների շրջանում տարածված ավանդություններից մեկի վրա՝ հեղինակը հնարավոր է համարում եզրակացնել, որ դարեր առաջ այրումների նախնիներն առանձնացել են Առանը բնակեցրած մյուս հիմնական էթնիկ խմբերից²¹: Նա իր ենթադրության մեջ ժամանակաշրջան չի նշում, իսկ այս վարկածը շտապում է կապել «այրում» անվան ստուգաբանության հետ. թյուրքական լեզուներում առկա է «այրըմ» բառը, որը նշանակում է «բաժանում», «առանձնացում»: Ք. Քարաքաշլին ենթադրում է, որ այրումների ինքնավանումն առաջացել է հենց պատմական բաժանման հետևանքով²²:

Սակայն մեր կարծիքով այս վարկածը թերի է, քանի որ հեղինակը խոսում է լեռնաշխարհի թյուրքերի ու այրումների ֆիզիկական ու կենցաղային տարբերությունների մասին՝ ակնարկելով այրումների ոչ թյուրքական ծագման մասին: Միաժամանակ իր կողմից որպես պատմական փաստ ընդունված ավանդության մեջ նշվում է բնիկ առանցիների ու նրանցից առանձնացած խմբի մասին, հետևաբար դեպքերը պիտի տեղի ունեցած լինեին մինչև Առանի թյուրքացումը: Այդ դեպքում բնիկ խմբի կողմից թյուրքական «այրըմ» ինքնանվանման ընտրությունը անտրամաբանական է ստացվում:

Բոլոր դեպքերում կրկնենք Ք. Քարաքաշլիի դաշտային ուսումնասիրության ընթացքում արձանագրված ուշագրավ պատմությունը, որը մի կողմից՝ որոշ չափով լույս է սփռում այրումների ծագման վրա, մյուս կողմից էլ՝ մատնացույց անում նրանց խառը ծագման բացահայտման դժվարությունները, միգուցե՝ նաև դրա անհնարինությունը: Այրումներին այցելած հեղինակին 1804 թ. ծնված մի ծերունի պատմել է, թե իրենց երակներում մի քանի ազգերի արյուն է հոսում. տեղի է ունեցել շատ մեծ միախառնում, և այրումների երակներում հոսում է հայկական, լեզգիական, պարսկական ու թյուրքական արյուն, իսկ իրենք մուսուլման -այրումներ են²³:

Այրումներին ուսումնասիրած ադրբեջանցի պատմաբան Ա. Ալեքպերովը նրանց ծագումը կապում է աղուանական էթնոսի և եկվոր թյուրքական տարրի համախմբման հետ²⁴: Ընդ որում, նրա կարծիքով՝ միջնադարում այրումների բնիկ նախնիները եղել են հայկական էթնոսի մշակութային, լեզվական ու կրոնական ուժեղ ազդեցության տակ և ձուլվել են հայերի հետ: Սակայն 451 թ. Քաղկեդոնի ժողովից հետո հայերն ու աղուանները բաժանվեցին 2 խմբի՝ միաբնակության կողմնակիցների և դրա հակառակորդների: Վերջին խմբին Քաղկեդոնի ժողովից հետո սկսեցին անվանել «հայ հոռոմ», որպիսի անվան հետ էլ Ալեքպերովը կապում է «այրում» բառի ծագումը²⁵: Նրա կարծիքով՝ հայերեն նախնական բառը դարերի ընթացքում աղավաղվել է, մոտեցել թյուրքական արտասանությանն ու դարձել «այրում», վերջինս էլ նոր էթնիկ

²¹ В. Кобычев, Айрумы(К вопросу о происхождении этнонима),_ СЭ, 1962, № 3, с. 140.

²² Նույն տեղում:

²³ В. Кобычев, Айрумы(К вопросу о происхождении этнонима),_ СЭ, 1962, № 3, с. 141.

²⁴ А. Алекперов, У айрумов, Изд. общества обследования и изучения Азербайджана, № 5, Баку 1928, с. 240.

²⁵ Նույն տեղում:

միախառնումների ենթարկված, թյուրքախոս և մուսուլման դարձած բնակչության համար դարձել է ինքնանվանում:

Պատմաբան Վ. Կոբիչևը մասամբ մերժում է, մասամբ էլ՝ հաստատում Ալեքսանդրովի առաջ քաշած վարկածը: Նա նույնպես «այրում» բառի ծագումը կապում է «հայ հոռոմ» եզրույթի հետ, սակայն այրումների ծագումն ու էթնանվան առաջացումը պայմանավորում է ոչ թե Քաղկեդոնի ժողովով, այլ 591 թ. Սասանյան Պարսկաստանի և Բյուզանդիայի միջև Հայաստանի երկրորդ բաժանմամբ²⁶: Ըստ Կոբիչևի՝ բաժանման գծի բյուզանդական սահմանային հատվածում 7-րդ դարում առաջացել են «ոում» անվան հետ կապված տեղանուններ, որոնք ժամանակի ընթացքում թյուրքացվել են: Որպես օրինակ բերվում են Ուռում-բազար և Խեյրում տեղանունները, որոնք հեղինակը ստուգաբանում է որպես «հոռմեական շուկա» և «հայ հոռոմ»: Սահմանային այս հատվածի հայերին ու հայկական ազդեցությամբ ձուլված աղուաններին անվանել են հայ -հոռոմ, որը նշանակել է բյուզանդահայատակ հայ: Կոբիչևը եզրակացնում է, որ այրումները պատմական Աղոսանքի և Հայաստանի միջև սահմանային շրջանների հայերի ու աղուանների հետնորդներն են, որոնք դարերի ընթացքում իսլամացվել և թյուրքացվել են: Նրանց բնակության գործառնամարզը (արեալը) ժամանակի ընթացքում որոշ չափով տեղափոխվել է դեպի արևելք²⁷:

Այրումների ծագման վարկածները շատ են: Դրանք ունեն ինչպես հատման եզրեր, այնպես էլ ակնհայտ հակասություններ: Մեր կարծիքով՝ ամենից ակնհայտ ընդհանրությունն այն է, որ գրեթե բոլոր վարկածների համաձայն այրումների ծագման գործում դեր է կատարել ինչպես եկվոր թյուրքական տարրը, այնպես էլ տեղաբնիկ էթնոսը: Դժվարություն է ներկայացնում թյուրքական տարրի հայտնվելու ճշգրիտ ժամանակի որոշումը և «այրում» էթնանվանման ծագման միակ ճշգրիտ տարբերակի բացահայտումը:

Հայտնի է այրումների շրջանում Այսրկովկասից Ատրպատական զանգվածաբար անցնելու երկու փուլ: Ժողովրդագետ Մ. Վելիլին նշում է, որ դրանցից առաջինը տեղի է ունեցել 14-րդ դ. վերջին: Ատրպատական տեղափոխված այրումները Շահ Աբբասի օրոք մտել են շահսևանների ցեղային միության մեջ²⁸: Երկրորդ արտահոսքը տեղի է ունեցել 19-րդ դ. առաջին կեսին: 1828 թ. կնքված Թուրքմենչայի պայմանագրով Իրանը Ռուսական կայսրությանը զիջեց Այսրկովկասի վերջին տիրույթները: Իրանի գահաժառանգ Աբբաս Միրզայի կոչով Արաքս գետից հյուսիս բնակվող թյուրքական որոշ ցեղեր անցան գետից հարավ, որտեղ ստացան նոր կեցավայրեր ու արոտավայրեր: Այրումների մի մասն անցնելով Ատրպատական՝ բնակություն հաստատեց Ավաջիքի շրջանում (պատմական Արտազ գավառի արևմուտք)²⁹:

²⁶ В. Кобычев, Айрумы (К вопросу о происхождении этнонима), с. 145.

²⁷ Նույն տեղում, էջ 145-148:

²⁸ М. Велили (Бахарлы), Этнография Азербайджана, <http://ethnoglobus.az/> .

²⁹ ĀYRĪMLŪ (in Persian often Āyromlū), Turkic tribe of western Azerbaijan, – Encyclopaedia Iranica, Vol. III, Fasc 2, p. 151-152.

Այրումների բնակության հիմնական արեալը Արևելյան Այսրկովկասի հյուսիս-արևմտյան հատվածն է, որը 19-րդ դարի վերջում մտնում էր Ելիզավետպոլի նահանգի կազմի մեջ: Այստեղ էլ պահպանվել են Այրում անունով որոշ բնակավայրեր: Նահանգի Ելիզավետպոլի գավառի Այրում (Ղարա- Մուրադ Այրում) բնակավայրում 1886 թ. տվյալներով բնակվում էր ավելի քան 2000 բնակիչ, որոնք վիճակագրական տվյալներում նշված են որպես թաթարներ³⁰: Այրումների էթնանունն առկա է նաև Ղազախի գավառի Ղուշչու- Այրում համայնքի պարագայում, որի բնակիչների թիվը կազմում էր 612 մարդ³¹:

Արևելյան Այսրկովկասի խոշոր ցեղային միավորումներից մեկն էին *շահսևանները*, որոնք մեծ դեր են ունեցել երկրամասի էթնիկ գործընթացներում: Ի տարբերություն շատ այլ թյուրքական ցեղերի՝ նրանց մասին բազմաթիվ, թեպետև հակասական տեղեկություններ են պահպանվել: Այս ցեղամիությունը միավորում էր թյուրքական ծագմամբ ցեղերի, որոնց մեծամասնությունը կապված էր Շահ Աբբասի ժամանակաշրջանի ղզլբաշների հետ, թեպետ պատմագիտության մեջ չկա միասնական մոտեցում շահսևանների ծագման և այդ գործընթացի ժամանակաշրջանի վերաբերյալ: Շահսևանների՝ որպես ցեղային միության ձևավորվելու ժամանակաշրջան նշվում են 16-18-րդ դարերը:

19-րդ դարում շահսևաններին ուսումնասիրած հետազոտողները ներկայացնում են նրանց շրջանում տարածված իրենց ծագման միևնույն ավանդապատումը: Ըստ այդ պատումի՝ Յունսիր փաշա անունով անձը իր քոչվոր ցեղի հետ Փոքր Ասիայից գաղթել է Պարսկաստան և շահից ապաստան խնդրել: Պարսից շահը նրան բարեհաճությամբ ընդունել է և թույլ տվել իր ցեղի համար քոչի վայր ընտրել: Յունսիր փաշան ի վերջո կեցավայր է ընտրել Արդաբիլը³²:

Անգլիացի պատմաբան, պետական ու ռազմական գործիչ Ջոն Մալքոլմն իր «Պարսկաստանի պատմություն» աշխատության մեջ նշում է, որ Շահ Աբբասը ցանկանում էր հակակշիռ ստեղծել ապստամբ ղզլբաշական ցեղերի ու նրանց անհնազանդ առաջնորդների դեմ և այդ նպատակով հիմնեց սեփական ցեղային միությունը, որն անվանեց Շահսևան: Շահ Աբբասը նոր միություն հրավիրեց ցանկացողներին բոլոր ցեղերից՝ խոստանալով նրանց իր բարեհաճությունն ու պաշտպանությունը³³: Շահսևանների թիվը շատ արագ աճում էր, նույնիսկ պատահել է, որ մեկ օրում որպես շահսևան գրանցվել է 10 հազար մարդ³⁴:

Այլ վարկածի համաձայն՝ Շահսևան անվանումը տիտղոս էր, որը ժամանակ առ ժամանակ տրվում էր քոչվոր ցեղերին՝ նրանց հավատարմությունը շահին

³⁰ Свод статистических данных о населении Закавказского края, извлечённых из посемейных списков 1886 года, Елисаветпольский уезд, Тифлис, 1893.

³¹ Свод статистических данных о населении Закавказского края, извлечённых из посемейных списков 1886 года, Казахский уезд, Тифлис, 1893.

³² R. Trapper, Shahsevan in Safavid Persia, – BSOAS, Vol. 37, № 2, London, 1974, p. 331.

³³ J. Malcolm, The History of Persia: From the Most Early Period to the Present Time, London, 1829, p. 369.

³⁴ Ջ. Մալքոլմը շահսևան անունը թարգմանում է որպես «շահի ընկերներ», սակայն ավելի ստույգ թյուրքական ծագմամբ այս բառը նշանակվում է «շահին սիրող»:

մատնանշելու համար: Ընդ որում, այն տրվում էր ոչ միայն թյուրքական, այլև քրդական և իրանական ծագմամբ որոշ ցեղերի, սակայն տվյալ պրակտիկան 17-րդ դարում հատկապես կիրառվում էր ղզլբաշական թյուրքական ցեղերի դեպքում³⁵: Մասամբ այս վարկածի օգտին է խոսում Վլ. Մինորսկու թարգմանած ու վերլուծած Թագքիրաթ ալ-Մուլուք երկում դեռ Շահ Աբբասից առաջ Shahi-sevan ցեղերի հիշատակվելը: Նշվում է, որ նրանք պահանջում էին պետության ղեկավար պաշտոններին նշանակել իրենց առաջնորդներին և հաճախ շահի ներկայությամբ գժտվում էին. Թահմասպ Ա-ն փորձեց բարեփոխել այս համակարգը և կարգի հրավիրել ըմբոստ ցեղերին, սակայն դա հաջողվեց անել միայն Շահ Աբբաս Ա-ին³⁶:

Բ.Բալայանի կարծիքով՝ շահսևանների հիմնական զանգվածը կազմում էին առանձին ղզլբաշական տոհմացեղային խմբեր, որոնց մի մասը մասնակի կամ լիակատար դեֆորմացիայի էր ենթարկվել³⁷: Թյուրքական լեզվի միմյանց նման խոսվածքներով, ծագմամբ ու կենցաղով այս խմբերը, առանձնանալով իրենց նախնական ցեղերից, Շահ Աբբասի հրավերով միանում էին նոր ձևավորվող Շահսևան միավորմանը: Բ. Բալայանի բնորոշմամբ՝ Շահ Աբբասը փաստացի նոր ցեղախումբ էր ձևավորում, որի ցեղապետը դառնում էր հենց ինքը՝ Շահը³⁸: Հայտնի է, որ Շահ Աբբասը Մուղանում բնակեցրել է շահսևանների բազմաթիվ ընտանիքների³⁹: Հետագայում շահսևանները մեծ դեր են խաղացել Մուղանի շրջանի քաղաքական պատմության մեջ:

Հավանաբար, սկզբնական շրջանում «շահսևան» անունը ցեղային պատկանելություն չի մատնանշել, այլ եղել է տիտղոս, հատուկ անուն, որը ցույց էր տալիս տվյալ որոշակի անունով ցեղի հավատարմությունը Սեֆյան շահին: Ղզլբաշական ցեղերի շրջանում իրենց հավատարիմ ցեղերին «շահսևան» տիտղոսը տալով՝ Պարսից շահերն ամրապնդում էին իրենց իշխանությունը՝ նույն ղզլբաշական մի շարք հզոր ցեղերի իշխանական նկրտումների հաճախակի ապստամբությունների պայմաններում⁴⁰: Հետագայում արդեն այդ ցեղերը միավորվել են «շահսևան» անունով ցեղային միավորման մեջ ու որոշ ժամանակ պահպանել են իրենց նախկին ցեղային անվանումները: Սակայն շահսևանների միությունը կայուն չէր ու անընդհատ համալրվում էր: Հայտնի է, օրինակ, որ այրումների մի մասն անցել է Պարսկաստան և Շահ Աբբասի կողմից ստացել է «շահսևան» անունը: Հետագայում այրումներն արդեն շահսևաններ անվան տակ անցել են Այսրկովկաս և տարածվել նախ Մուղանում,

³⁵ R. Trapper, Shahsevan, – Encyclopaedia Iranica, 2010. <http://www.iranicaonline.org/articles/shahsevan> .

³⁶ Tadhkirat Al Mulük: Manual of Safavid administration. Persian text in facsimile, Translated and explained by V. Minorsky, London, 1943, p. 30.

³⁷ Б. П. Балаян, К вопросу об общности этногенеза шахсевен и кашкайцев, – «Արևելազիտական ժողովածո», I, Եր., 1960, էջ 348:

³⁸ Նույն տեղում, էջ 351:

³⁹ История Азербайджана, т. I, с. 266.

⁴⁰ Կարելի է հիշատակել թեկուզ Թեքելյու ցեղը, որը բազմիցս ապստամբել էր Սեֆյան շահերի դեմ, այնուհետև նորից ներում ստացել ու նորից ընդվզել: (տե՛ս Ի. Պ. Петрушевский, Очерки по истории феодальных отношений в Азербайджане и Армении в XVI – нач. XIX в., Ленинград, 1949, с. 57).

այնուհետև՝ Արևելյան Այսրկովկասի այլ շրջաններում⁴¹: Շահսևաններին միացած ցեղերի թվում հիշատակվում են նաև խոշոր Ինալլու, Բեկդիլի, Իլխիչի ցեղերը⁴²:

Շահսևան ցեղային միության ներսում անդադար ընթացող էթնիկական համախմբման արդյունքում նախկին ցեղային պատկանելությունն աստիճանաբար տարրալուծվել է, և սկսել է գերակայել «շահսևան» ինքնանվանումը: Այս իրողությունը արդեն 19-րդ դ. ուսումնասիրողների մի մասի մոտ այն կարծիքն է ստացել, որ շահսևանները հենց սկզբից միասնական ցեղ կամ ցեղախումբ են եղել:

Ռուս ժողովրդագետ Ն. Ջեյդլիցը 19-րդ դ. երկրորդ կեսին շահսևաններին հիշատակում է որպես Բաքվի նահանգի զգալի թվաքանակով թյուրքական ցեղի: Ըստ նրա՝ շահսևաններն ամռանը բնակվում էին Արդաբիլի մոտակայքում, իսկ ձմռանը 3490 վրաններով քոչում դեպի Մուղանի դաշտ⁴³:

Երկար ժամանակ շահսևաններն ազատ անցնում էին Իրան, այնուհետև վերադառնում Ռուսական կայսրության տիրապետության տակ գտնվող Արևելյան Այսրկովկաս: Սակայն նրանց քոչվորական կենսակերպը վնասում էր շրջանում գյուղատնտեսության զարգացմանը: Բացի այդ՝ հաճախակի էին նստակյաց բնակչության բնակավայրերի վրա հարձակումները հենց շահսևանների կողմից: Ռուսական իշխանության պահանջով 1830-1860-ական թթ. Իրանի տիրակալները փորձում էին կարգ ու կանոն հստատել Մուղանի դաշտավայրի իրենց ենթակա հատվածում, սակայն՝ անհաջող, և քոչվորների սահմանային ասպատակությունները շարունակվում էին⁴⁴: Ի վերջո, 1880-1885թթ. ցարական իշխանությունը քոչվոր մնացած շահսևանների մեծ մասին վերջնականապես վերաբնակեցնում է Ատրպատականում:

Արևելյան Այսրկովկասի շահսևանները բաժանվում էին 3 մասի, դրանցից յուրաքանչյուրն էլ բաժանվում էր երեքական տոհմի⁴⁵:

19-րդ. դարի երկրորդ կեսին շահսևանների մի մասը նստակյաց կենցաղ էր ընդունել ու բնակվում էր Լենքորանի գավառի (ուեզդի) հյուսիսի, Արաքս գետի արևելյան ափի թաթարական գյուղերում: Ջեյդլիցը Բաքվի գավառում հիշատակում է Ահմեդլու և Ղուլամ- Մահմուդ գյուղերը, որոնք բնակեցված էին շահսևաններով⁴⁶:

19-20-րդ դարերի սահմանագծին Արևելյան Այսրկովկասում եղել են բազմաթիվ տեղանուններ ոչ միայն Շահսևան անունով, այլև այն ցեղերի անուններով, որոնք տարբեր ժամանակաշրջաններում մտել են շահսևանների կազմի մեջ: Մասնավորապես Շահսևան, Բեյդիլի, Ինալլու, Իլխիչի անուններով բնակավայրեր

⁴¹ Г. Д. Агаев, Данные этнотопонимии о расселении тюркоязычных племён в Азербайджане XI-XV вв., – Этническая ономастика, Москва, 1984, с. 146.

⁴² М. Велили (Бахарлы), Этнография Азербайджана, <http://ethnoglobus.az/>.

⁴³ Н. К. Зейдлиц, Этнографический обзор Бакинской губернии, Приложение к Кавказскому календарю на 1871 г., приложение, с. 49.

⁴⁴ R. Tapper, MOĞĀN (or Dašt-e Moğān, also Muqān), a lowland steppe in Azerbaijan, – Encyclopaedia Iranica, <http://www.iranicaonline.org/articles/mogan-parent-i-ii>.

⁴⁵ Г. А. Гейбуллаев, Топонимия Азербайджана, с. 37.

⁴⁶ Н. К. Зейдлиц, Этнографический обзор Бакинской губернии, с. 50.

հիշատակվում են Շամախիի, Ջևաթի, Ղուբայի, Լենքորանի, Գյոքչայի գավառներում⁴⁷: 1886 թ. վիճակագրական տվյալներում Ելիզավետպոլի նահանգի Ջեբրայիլի գավառում հանդիպում է Շահսևան գյուղական համայնքը, որի բնակիչների թիվը կազմել է 736 մարդ⁴⁸: Շամախիի գավառում հիշատակվում է Շահսևան բնակավայրը և նշվում է, որ դրա 58 բնակիչները քոչվորներ են⁴⁹:

Կենդերլի ցեղի ծագման պատմությունը մի քանի վարկած ունի: Ժողովրդագետ Ի. Շոպենը Կենդերլի անունը կապում է օղուզական Քանլը ցեղի հետ, որոնցից սերել են նաև ռուսական պատմագրության մեջ հայտնի պեչենեգները: Հեղինակը կենդերլիների յուրահատուկ դիմագծերը՝ կապույտ աչքեր և բաց գույնի մազեր, դիտում է որպես նրանց հյուսիսային ծագման ապացույց⁵⁰:

Մ. Վելիլին պնդում է, որ կենդերլիներն Այսրկովկաս են եկել դեռ արաբական տիրապետության շրջանում և արաբները նրանց օգտագործել են Ատրպատականում ապստամբությունները ճնշելու համար: Հեղինակը ներկայացնում է կենդերլիների ծագման վերաբերյալ մի քանի ավանդապատումներ: Դրանցից մեկի համաձայն՝ ցեղն առաջացել է «կանկար» կամ «խանգար» բույսի անվանումից: Սովի ժամանակ թյուրքական ցեղերից մեկը սնվում էր այդ բույսի վայրի պտուղներով, ինչի համար էլ կոչվեց խանգար. Այսրկովկասում խանգարները բաժանվեցին խմբերի, որոնցից ամենակարևորը և մեծը Կենդերլի ցեղն էր, իսկ ավելի փոքր խմբերից էին կարափափախները կամ կարա-բյուրքները և ջաիրլիները⁵¹:

Մեկ այլ տեսակետի համաձայն էլ կենդերլիներն առանձնացել են հզոր ու հայտնի Ուսթաջլու ցեղից⁵²: Կենդերլիները տեղափոխվեցին Արաքս գետից հյուսից, երբ այդ տարածաշրջան եկան ուսթաջլուները⁵³:

Սեֆյան պետության ժամանակաշրջանում կենդերլի ցեղը ազդեցիկ է եղել հատկապես Նախիջևանում, որը դարձել էր այս ցեղի բնակության հիմնական վայրը: Ի. Շոպենը 19-րդ դ. առաջին կեսում գրված իր աշխատության մեջ նշում է, որ Նախիջևանի շրջանում կենդերլիների թիվը 6473 էր⁵⁴: 16-ից մինչև 19-րդ դ. սկիզբ Նախիջևանի հաքիմի (ղեկավարի) պաշտոնը պատկանում էր Կենդերլի ցեղին և փոխանցվում էր սերնդից սերունդ⁵⁵: 18-րդ դ. կեսից նրանք արդեն խանի տիրոջ էին

⁴⁷ М. Велили (Бахарлы), Этнография Азербайджана, <http://ethnoglobus.az/>; Свод статистических данных о населении Закавказского края, извлечённых из посемейных списков 1886 года, Гёкчайский уезд, Тифлис, 1893.

⁴⁸ Свод статистических данных о населении Закавказского края, извлечённых из посемейных списков 1886 года, Джебраильский уезд, Тифлис, 1893.

⁴⁹ 2 Свод статистических данных о населении Закавказского края, извлечённых из посемейных списков 1886 года, Шемахинский уезд, Тифлис, 1893.

⁵⁰ И. Шопен, Исторический памятник состояния Армянской области, с. 537

⁵¹ М. Велили (Бахарлы), Этнография Азербайджана, <http://ethnoglobus.az/>.

⁵² И. П. Петрушевский, Очерки по истории феодальных отношений в Азербайджане и Армении, с. 132.

⁵³ KANGARLU, a Turcic tribe of Azerbaijan and the Qom-Verāmin region of central Persia, – Encyclopaedia Iranica, Vol. XV, Fasc. 5, p. 495.

⁵⁴ И. Шопен, Исторический памятник состояния Армянской области, с. 538

⁵⁵ И. П. Петрушевский, Очерки по истории феодальных отношений в Азербайджане и Армении, с. 104.

կրում⁵⁶: Սեֆյանների պետության մի մասը կազմող Նախիջևանի գոտում կենդերլի ցեղի ազդեցիկության մասին են վկայում պաշտոնական հրամանագրերում եղած վկայությունները: Մասնավորապես 1605թ. Շահ Աբբաս Ա-ն Նախիջևանի կառավարիչ Մաքսուդ Սուլթան Կենդերլիին հրամայում է տեղահանել Ջուլֆայի հայերին: Պարսից շահերի առանձին ֆերմաններ վերաբերում են հատուկ Կենդերլի ցեղին: Այսպես՝ Պարսկաստանի տիրակալ Քերիմ խանը 1753 թ. ֆերմանով Ալի Մուհամմադ բեգ Կենդերլուին հաստատում էր որպես Կենդերլի ցեղի առաջնորդ, նաև որպես Կենդերլի էլի (վարչա-տարածքային միավոր) վաքիլ (ներկայացուցիչ)⁵⁷: 1770 թ. Քերիմ խանն իր մեկ այլ ֆերմանով Կենդերլի ցեղի առաջնորդ և Կենդերլի էլի ղեկավար էր հաստատում մահաջադ Ալի Մուհամմադ բեգի որդուն՝ Քարիմ սուլթան Կենդերլիին: 1773 թ. Քերիմ խանը Լութֆ Ալի բեգ Կենդերլիին նշանակում է Նախիջևանի իշիկակասիբաշի (գլխավոր արքունի)⁵⁸:

Ղարաբաղի խանության հիմնադրումից հետո Փանահ խանը կենդերլիների մի մասին տեղափոխել է իր խանության տարածք, որտեղից էլ նրանք տարածվել են Արևելյան Այսրկովկասում: Մասնավորապես, Ղուբայի Ֆաթի Ալի խանը Ղարաբաղի խանության վրա հարձակումների ժամանակ իր հետ տանում էր նաև բնակչության մի մասին: Այդպես Ղուբայի շրջանում ձևավորվել են կենդերլիների հետ կապված Ջաղաթայ, Կենդերլի, Ղոփանի գյուղերը⁵⁹: Նույն Ղուբայի գավառի հարավում 19-րդ դ. կեսին հիշատակվում է Այգյունլի գյուղը, որը նաև կոչվում է Կենդերլի. նույն ժամանակաշրջանում Ղազախի գավառում նշվող Վերին ու Ստորին Սալաքլի և Սոֆուլլու գյուղերը վերագրվում են Կենդերլի ցեղին⁶⁰: 19-րդ դ. վերջին Բաքվի նահանգի Ղուբայի գավառում հանդիպում ենք Կենդերլի անունով գյուղի⁶¹: Շամախիի գավառի Կենդերլու գյուղն ուներ 206 բնակիչ⁶²:

Մուղանլու անունով ցեղային միությունը միավորում էր քոչվոր և կիսաքոչվոր թյուրքական ցեղերի, որոնք բնակվում էին մեծ մասամբ Մուղանի դաշտում: Մուղանլու էր կոչվում նաև շահսևանների ցեղային միության ցեղերից մեկը, որը բաղկացած էր 300 վրանից⁶³: Ըստ երևույթին, մուղանլուների մի մասը ժամանակին մտել էր ավելի մեծ և հզոր Շահսևան կոնֆեդերացիայի մեջ: 18-րդ դ. սկզբին նկարագրելով Սալյանի գավառը՝ ցարական բանակի մայոր Ի. Գերբերը նշում է այնտեղ և իրանական սահմանից այն կողմ բնակվող շահսևանների ու մուղանլուների մասին: Նրա

⁵⁶ Նույն տեղում, էջ 133:

⁵⁷ Тбилисская коллекция персидских фарманов, том II, с. 84.

⁵⁸ Նույն տեղում:

⁵⁹ Г. А. Гейбуллаев, Топономия Азербайджана (историко-этнографическое обозрение), с. 37.

⁶⁰ Материалы для изучения экономического быта государственных крестьян Закавказского края, т. II, Тифлис, 1887, с. 43, 220.

⁶¹ Свод статистических данных о населении Закавказского края, извлечённых из посемейных списков 1886 года, Кубинский уезд, Тифлис, 1893.

⁶² Свод статистических данных о населении Закавказского края, извлечённых из посемейных списков 1886 года, Шемахинский уезд, Тифлис, 1893.

⁶³ Г. А. Гейбуллаев, Топономия Азербайджана (историко-этнографическое обозрение), с. 38.

վկայությամբ՝ շահսևաններն ու մուղանլուները ձմռանն իրենց ընտանիքներով ու անասուններով գալիս էին Սալյան և խոտի համար նշանակված հարկերը մուծելով ձմեռում այդ շրջանում⁶⁴:

Խոսելով Չաքաթալայի մոտ բնակվող թյուրքական մուղանլու ցեղի մասին՝ Վ. Մինոբսկին նշում է, որ այն, հավանաբար, այդտեղ էր տեղափոխվել Մուղանից⁶⁵: Նույն Չաքաթալայի օկրուգում 19-րդ դ. վերջում հիշատակվում են մուղալները, որոնց թիվն անցնում էր 21 հազարից⁶⁶: 1887 թ. նրանք հայերի հետ միասին հիշվում են որպես Ելիզավետպոլի նահանգի Արեշի գավառի 2 գլխավոր ժողովուրդներից մեկը⁶⁷: 19-րդ դ. վերջում Բաքվի նահանգի Ջևաթի գավառում հիշատակվում է Մուղանլու բնակավայրը⁶⁸: Ջեբրայիլի գավառի Մուղանլու գյուղում բնակվում էր 138 մարդ⁶⁹: Նույն ժամանակաշրջանում Մուղանլու գյուղ կար նաև Ղուբայի գավառի հարավում⁷⁰: 1886 թ. ընտանեկան ցուցակներում Բաքվի նահանգի Ջևաթի գավառում նշված է Մուղանլու քոչվորական համայնքը՝ 2576 անդամներով⁷¹: Շամախիի գավառում էլ հիշատակվում է Մուղանլու գյուղական համայնքը՝ 494 բնակիչներով⁷²:

Թեքեյլու թյուրքական ցեղը հանդիպում է նաև Թեքլա անունով: Ի. Պետրուշևսկին թեքեյլուներին համարում է թուրքմենական Թեքե ցեղի ճյուղավորումներից մեկը, որն Իրանական Ատրպատական և Այսրկովկաս է եկել Փոքր Ասիայից⁷³: Ավելի վաղ՝ 11-րդ դարում, թուրքմենական թեքե ցեղը սելջուկների գլխավորությամբ ներխուժել էր Փոքր Ասիա: Սելջուկյան սուլթանության կործանումից հետո Փոքր Ասիայի հարավ-արևմուտքում Անթալյա կենտրոնով հիմնվել էր Թեքե բեյլիքը (իշխանությունը), որը հայտնի է նաև Համիդյանների բեյլիք անունով⁷⁴: Այս ինքնուրույն իշխանությունը գոյություն է ունեցել 1321-1423թթ.⁷⁵: Նրա կործանումից հետո Թեքեյլու ցեղի մի մասը

⁶⁴ И. Гербер, Описание стран и народов вдоль западного берега Каспийского моря. 1728, – В кн.: История, география и этнография Дагестана XVIII-XIX вв. Архивные материалы. Под ред. М. О. Косвена и Х. М. Хашаева, Москва, 1958 (далее – ИГЭД), с. 100-101.

⁶⁵ В. Ф. Минорский, История Ширвана и Дербенда X-XI веков, Москва, 1963, с. 128.

⁶⁶ Л. П. Загурский, Этнологическая классификация кавказских народов (Извлечено из рукописного труда). Приложение к Кавказскому календарю на 1888 г., с. 10.

⁶⁷ Материалы для изучения экономического быта государственных крестьян Закавказского края, т. VII, Тифлис, 1887, с. 145.

⁶⁸ Նույն տեղում, էջ 359:

⁶⁹ Свод статистических данных о населении Закавказского края, извлечённых из посемейных списков 1886 года, Джебраильский уезд, Тифлис, 1893.

⁷⁰ Материалы для изучения экономического быта государственных крестьян Закавказского края, том II, Тифлис, 1887, с. 234.

⁷¹ Свод статистических данных о населении Закавказского края, извлечённых из посемейных списков 1886 года, Джеватский уезд, Тифлис, 1893.

⁷² Свод статистических данных о населении Закавказского края, извлечённых из посемейных списков 1886 года, Шемахинский уезд, Тифлис, 1893.

⁷³ И. П. Петрушевский, Очерки по истории феодальных отношений в Азербайджане и Армении, с. 48.

⁷⁴ İ. N. Uzunçarşılı, Anadolu beylikleri ve Akkoyunlu, Karakoyunlu devletleri, TTK, Ankara, 1969, s. 62.

⁷⁵ Tekeoğulları, Merkezi Antalya olan Türkmen beyliği (1321-1423), – İslam ansiklopedisi, 1988-2013, cilt 40, s. 347.

մնաց Փոքր Ասիայի հարավում և կազմում էր տեղի քոչվոր թուրքմենական ցեղերի մի հատվածը⁷⁶: Ցեղի մի մասն էլ անցավ Իրան: Թեքելյուն թուրքական առաջին ցեղերից էր, որ միացավ Սեֆյանների շարժմանը: Թահմասպ Ա շահը 1540 թ. Շիրվանը հպատակեցնելուց հետո Թեքելյու ցեղին ու նրա առաջնորդ Ղազի խանին շնորհեց քոչվորության համար հարմար Շիրվանի մի քանի շրջաններ, մասնավորապես Սայյանն ու Մահմուդաբադը⁷⁷: Սակայն Թեքելյու ցեղը նաև ամենահաճախն էր ապստամբում Սեֆյանների դեմ: Ի վերջո, 1596 թ. շահական հրաման արձակվեց այս ցեղին գլխովին կոտորելու մասին: Նրանց մեծ մասը կոտորվեց, իսկ ողջ մնացածները մտան այլ ցեղերի կազմի մեջ⁷⁸:

Գ. Գեյբուլլայի պնդմամբ՝ 19-րդ դ. վերջում Արևելյան Այսրկովկասում բնակվում էին թեքելյու ցեղի շուրջ 30 տասնյակ ճյուղավորումներ⁷⁹: 19-րդ դ. վերջում Այսրկովկասում արված սոցիալ-տնտեսական ուսումնասիրություններում հիշվում են այս ցեղանվան հետ կապված տեղանուններ: Օրինակ՝ Ջևաթի գավառում հանդիպում ենք Թեքլյա անունով 3 բնակավայրի. հայնտի են նաև Ամիրալար- Թեքլյա, Թեքլյա Հաջի Մամեդ Հուսեյն, Թեքլյա Միրզա Բաբա գյուղերը⁸⁰: Լենքորանի գավառում նշվում են Թեքլյա, Թեքլյա Խոլ, Թեքլյա- Աքսազլար բնակավայրերը⁸¹: 20-րդ դ. սկզբի ժողովրդագետ Մ. Վելիլին հիշատակում է Թեքլյա անունով բնակավայրեր Գյոքչայի, Շամախիի, Ջևաթի, Ղուբայի, Լենքորանի, Ղազախի, Ելիզավետպոլի, Նուխիի գավառներում⁸²: 19-րդ դ. վերջին Ջևաթի գավառում նշված են Թեքելյու - Հաջի- Մամեդ- հուսեյն և Թեքելյու- Միրզա- բաբինի համայնքները՝ 1842 բնակիչներով: Նույն գավառի Թեքելյու -Ամիրալար գյուղը և համայնքի 1657 անդամները նշված են որպես քոչվոր. քոչվորական բնակչությունն ունի նաև նույն գավառի Թեքելյու համայնքը՝ 4440 բնակչով⁸³: Լենքորանի գավառի Թեքելյու-Աքսազլար գյուղն ունեւ 275 բնակիչ⁸⁴: Շամախիի գավառում հիշատակվում էր Թեքելյու- Սաֆի համայնքը, որի 127 բնակիչները քոչվորներ էին⁸⁵:

⁷⁶ Tekelü, Safevî Devleti'nin kuruluşunda rol oynayan Türkmen aşiretlerinden biri, - Islam ansiklopedisi, 1988-2013, cilt 40, s. 348.

⁷⁷ Б. П. Балаян, К вопросу об общности этногенеза шахсевен и кашкайцев, с. 336.

⁷⁸ И. П. Петрушевский, Очерки по истории феодальных отношений в Азербайджане и Армении, с. 57; Б. П. Балаян, К вопросу об общности этногенеза шахсевен и кашкайцев, с. 339.

⁷⁹ Г. А. Гейбуллаев, Топономия Азербайджана (историко-этнографическое обозрение), с. 37.

⁸⁰ Материалы для изучения экономического быта государственных крестьян Закавказского края, т. VII, Тифлис, 1887, с. 358-359.

⁸¹ Նույն տեղում, էջ 548,608, 704:

⁸² М. Велили (Бахарлы), Этнография Азербайджана, <http://ethnoglobus.az/>.

⁸³ Свод статистических данных о населении Закавказского края, извлечённых из посемейных списков 1886 года, Джеватский уезд, Тифлис, 1893.

⁸⁴ Свод статистических данных о населении Закавказского края, извлечённых из посемейных списков 1886 года, Кубинский уезд, Тифлис, 1893.

⁸⁵ Свод статистических данных о населении Закавказского края, извлечённых из посемейных списков 1886 года, Шемахинский уезд, Тифлис, 1893.

Շամլու ցեղի անվանումը ծագում է Շամ տեղանունից, որով նշվում էր Ասորիքի տարածքը: Այս ցեղը սելջուկյան ու մոնղոլական նվաճումներից հետո բնակեցվել էր հենց Ասորիքում: 15-րդ դ. սկզբում շամլու ցեղը վերաբնակեցվել է Իրանում: Ի. Պետրուշևսկին, հիմնվելով «Միլսիլաթ ան- Նասաբ-ի Սեֆնիյե» (Սեֆյանների տոհմաձառը) 17-րդ դարի ձեռագրի վրա, մեջբերում է Շամլու և Ռումլու ցեղերի հետ կապված ավանդազրույցը: Դրա համաձայն՝ Թեմուրը 1402թ. Սեֆյան Շեյխ Հոջա Ալիին վասալական պատկանելության է տալիս Փոքր Ասիայից և Միլսիլայից տեղափոխվածների. շամլու և ռումլու ցեղերը գերի են ընկել 1402 թ. Անկարայի ճակատամարտում և Թեմուրը նրանց հանձնել է Սեֆյան շեյխ Հոջա Ալիին⁸⁶:

15-րդ դարի Ակ-կոյունլուների պետության ժամանակաշրջանում շամլուն եղել է այս ցեղամիության հիմնական ցեղերից մեկը: Պաշտոնապես շամլուները չեն մտել Ակ-կոյունլուների կազմի մեջ, սակայն հայտնի է Ակ-կոյունլու տիրակալ Յաղուբի և շամլուների միջև մի միջադեպի մասին վկայող փաստաթուղթը: Հալեպի, Ադանայի և Տարսուսի գոտում քոչող շամլուները սպանում են օսմանյան սուլթանի ներկայացուցչին և դրանով հարվածի տակ դնում ակ-կոյունլուների և օսմանցիների հարաբերությունները: Յաղուբը հրամայում է պատժել շամլուներին, սակայն միջադեպը մի կերպ հաջողվում է հարթել խաղաղ ճանապարհով⁸⁷:

Այսրկովկասում շամլու ցեղը բաժանվում էր 2 ճյուղի՝ Բեկդիլլի և Աբդուլլու: Կուսկաշենի ու Վարդաշենի շրջաններում Շամլի անունով բնակավայրերը, հավանաբար, կապ ունեն շամլու ցեղի հետ⁸⁸: Շամլուների դերը նշանակալիորեն մեծացել է Ակ-կոյունլուների պետության անկումից հետո ձևավորված Սեֆյան Իրանում: Շամլուն դարձել է ղզլբաշական ցեղային դաշինքի հիմնադիրներից մեկը. Պարսից արքունիքում շամլու ցեղի ամիրաները առանձնահատուկ տեղ ու դիրք են ունեցել և մշտապես վայելել են տիրակալի բարեհաճությունը, իսկ Շահ Թահմասպի օրոք շամլուները նույնիսկ համարվել են ղզլբաշական ցեղերից ամենահզորը⁸⁹:

16-րդ դարում Մուղանը գտնվում էր ղզլբաշական ցեղերի՝ այդ թվում նաև շամլու ցեղի տիրապետության տակ⁹⁰: Նույն դարի վերջին Շիրվանի կառավարիչ Աբաս խանը շամլու ցեղի ներկայացուցիչներին Շիրվանում կալվածքներ է տալիս⁹¹: Շահ Աբբասի օրոք հիշատակվում են Շիրվանում բնակվող շամլու ցեղի ճյուղավորումներ⁹²:

⁸⁶ И. П. Петрушевский, Очерки по истории феодальных отношений в Азербайджане и Армении, с. 90.

⁸⁷ J. Woods, The Aqquyunlu (clan, confederation, empire), The University of Utah press, 1999, p. 197.

⁸⁸ Г. А. Гейбуллаев, Топономия Азербайджана (историко-этнографическое обозрение), с. 28.

⁸⁹ И. П. Петрушевский, Очерки по истории феодальных отношений в Азербайджане и Армении, с. 92, 100, 192.

⁹⁰ R. Tapper, MOĠĀN (or Dašt-e Moġān, also Muqān), a lowland steppe in Azerbaijan, - Encyclopaedia Iranica, <http://www.iranicaonline.org/articles/mogan-parent-i-ii>.

⁹¹ А. Бакиханов, Гюлистан-и Ирам, с. 102

⁹² И. П. Петрушевский, Очерки по истории феодальных отношений в Азербайджане и Армении, с. 110.

1886 թ. Այսրկովկասի վիճակագրական տվյալներում Ելիզավետպոլի նահանգի Արեշի գավառում հիշատակվում է Շամլու անունով բնակավայրը⁹³: Շամլը անունով փոքր բնակավայր նշված էր նաև Բաքվի նահանգի Շամախիի գավառում⁹⁴:

Բայաթ ցեղը նախ Մահմուդ Կաշգարիի, այնուհետև նրանից օգտված Ռաշիդ ադ-Դինի մոտ նշված է որպես օղուզական 24 ցեղերից մեկը: Այն կոչվում էր առասպելական Օղուզ խանի որդիներից մեկի անունով⁹⁵: Ենթադրվում է, որ բայաթ ցեղի առաջին ներկայացուցիչները Իրան և Փոքր Ասիա են եկել սելջուկյան արշավանքների ու տիրապետության ժամանակ: Այդ ցեղի ճյուղավորումները տարածված են եղել ամբողջ Փոքր Ասիայում, Ասորիքում, Իրաքում, Իրանում և Ատրպատականում⁹⁶:

15-րդ դարում բայաթները մտել են Ակ-կոյունլուների ցեղային միության մեջ և կարևոր դեր են խաղացել թուրքմենական այս պետության քաղաքական կյանքում⁹⁷: Ակ-կոյունլուների տիրապետության ժամանակ բայաթ ցեղի ասորիքյան ճյուղի մի խումբ տեղափոխվել է Գյանջա (Գանձակ) և Բարդա (Պարտավ)⁹⁸:

15-րդ դ. վերջին Բայաթ ցեղի 40 հազար ընտանիք միացել է Իրանում իշխանության համար Սեֆյանների պայքարին, դարձել նրանց դաշնակիցը և համալրել ղզլբաշական ցեղերի ցանկը⁹⁹: Հայտնի է, որ Շահ Աբբաս Ա բայաթ ցեղի իշխաններին ու նրանց զորքին տեղակայել է «Ազարբայջան» նահանգում: Արդյունքում նրանց մի մասը բնակություն է հաստատել նահանգի տարբեր շրջաններում¹⁰⁰: Իրաքում հաստատված բայաթներից էր սերում 16-րդ դարի արևելյան հայտնի բանաստեղծ Մուհամմադ Ֆիզուլին¹⁰¹:

Սեֆյան շահ Իսմայիլը բայաթների մի մասին Իրաքից տեղափոխել է հյուսիս և բնակեցրել Շաքրանի ու Դերբենդի շրջակայքում¹⁰²: 1628 թ. Դերբենդը պաշտպանող ու այնտեղ բնակություն հաստատած ղզլբաշ զինվորների թվում նշվում են նաև բայաթները¹⁰³: 16-17-րդ դարերում բայաթ ցեղը հիշատակվում է որպես Շիրվանում ամենալավ արքայավայրերն ունեցող ղզլբաշական ցեղերից մեկը¹⁰⁴: Ղուբայի Ֆաթի Ալի

⁹³ Свод статистических данных о населении Закавказского края, извлечённых из посемейных списков 1886 года, Арешский уезд, Тифлис, 1893.

⁹⁴ Свод статистических данных о населении Закавказского края, извлечённых из посемейных списков 1886 года, Шемахинский уезд, Тифлис, 1893.

⁹⁵ Рашид-ад-Дин, Сборник летописей, т. I, кн. I, с. 89-90.

⁹⁶ BAYĀT, an important Turkish tribe, – Encyclopaedia Iranica, Vol. III, Fasc. 8, p. 882-884; F. Sümer, Bayatlar, – Islam ansiklopedisi, cilt 1, 1988-2013, s. 373- 390.

⁹⁷ J. Woods, The Aqquyunlu (clan, confederation, empire), p. 185.

⁹⁸ F. Sümer, Bayatlar, – Islam ansiklopedisi, cilt 1, 1988-2013, s. 390.

⁹⁹ И. П. Петрушевский, Очерки по истории феодальных отношений в Азербайджане и Армении, с. 92.

¹⁰⁰ BAYĀT, an important Turkish tribe, – Encyclopaedia Iranica, Vol. III, Fasc. 8, p. 882-884.

¹⁰¹ J. Woods, The Aqquyunlu (clan, confederation, empire), p. 185.

¹⁰² А. Бакиханов, Гюлистан-и Ирам, с. 95. Г. А. Гейбуллаев, Топономия Азербайджана (историко-этнографическое обозрение), с. 28.

¹⁰³ И. П. Петрушевский, Очерки по истории феодальных отношений в Азербайджане и Армении, с. 140.

¹⁰⁴ Նույն տեղում, էջ 311:

խանը օգնության ու հովանավորչության խնդրանքով կայսրուհի Եկատերինա Բ-ի մոտ է ուղարկում Դերբենդից Միրզա բեգ Բայաթին¹⁰⁵:

19-րդ դ. վերջում Բաքվի նահանգի Գյոքչայի գավառում նշված է Բայաթ- Մելիք- Ումուդ համայնքը 433 բնակչով¹⁰⁶: Նահանգի Ղուբայի գավառում Բայաթ անունով մեծ գյուղական համայնքը, որն ընդգրկում էր 10-ից ավելի գյուղեր և ուներ 1719 բնակիչ¹⁰⁷: Շամախիի գավառի Բայաթ- Նազիր Հուսեյն գյուղն ուներ 46 բնակիչ, իսկ Բայաթ- Աղբուլաղ գյուղը՝ 103¹⁰⁸:

Թյուրքական *Ալփաուտ* ցեղի մուտքն Առաջավոր Ասիա՝ աղբյուրներում հիշատակված չէ, ուստի դժվար է ասել՝ ալփաուտները տարածաշրջան են քոչել սելջուկյան, թե՛ մոնղոլական արշավանքների ընթացքում: Այս ցեղն իր հզորության և ազդեցիկության գագաթնակետին է հասել Կարա-կոյունլուների թուրքմենական պետության շրջանում: Ալփաուտները Կարա-կոյունլուների ցեղային միության հիերարխիկ կառույցում համարվում էին ամենահզորներից մեկը, իսկ այս պետության պարտությունից հետո Ակ-կոյունլու Ուզուն Հասանի օրոք Ալփաուտ ցեղը մտավ մեկ այլ թուրքմենական՝ Ակ-կոյունլուների պետության և քոչվորական էլիտայի մեջ¹⁰⁹:

Գ. Գեյբուլլաևի դիտարկմամբ՝ հաստատված չէ, թե այս ցեղի ճյուղավորումները երբ են եկել Այսրկովկաս¹¹⁰: Սակայն ամենահավանական ժամանակահատվածը, թերևս, Սեֆյանների պետության հիմնադրումից հետո է: Հենց նրանց օրոք ալփաուտները որպես ղզլբաշներ քոչավայրեր են ստացել Հյուսիսային Ատրպատականում, Շիրվանում և Ղարաբաղում¹¹¹: Հայտնի է, որ ղզլբաշական ցեղերից 16-17-րդ դարերում Շիրվանում ամենալավ հողատարածքներն ունեին Ռումլու, Ալփաուտ և Բայաթ ցեղերի ներկայացուցիչները¹¹²: Ալփաուտ ցեղից Շիրվանում հարուստ կալվածքներ ուներ Մանսուր սուլթան անունով Էմիրը¹¹³:

19-րդ դ. վերջում ամբողջ Այսրկովկասում, նաև երկրամասի արևելքում Ալփաուտ անունով պահպանված բազմաթիվ բնակավայրերը ցույց են տալիս, որ ալփաուտները կազմել են Այսրկովկաս տեղափոխված թյուրքական ծագմամբ բնակչության կարևոր խմբերից մեկը: 19-րդ դ. վերջում Ալփաուտ անունով բնակավայրերը սփռված էին ողջ

¹⁰⁵ А. Бакиханов, Гюлистан-и Ирам, с. 162.

¹⁰⁶ Свод статистических данных о населении Закавказского края, извлечённых из посемейных списков 1886 года, Гёкчайский уезд, Тифлис, 1893.

¹⁰⁷ Свод статистических данных о населении Закавказского края, извлечённых из посемейных списков 1886 года, Кубинский уезд, Тифлис, 1893.

¹⁰⁸ Свод статистических данных о населении Закавказского края, извлечённых из посемейных списков 1886 года, Кубинский уезд, Тифлис, 1893.

¹⁰⁹ J. Woods, *The Aqquyuunlu (clan, confederation, empire)*, p. 98, 108.

¹¹⁰ Г. А. Гейбуллаев, *Топонимия Азербайджана (историко-этнографическое обозрение)*, с. 30.

¹¹¹ Tadhkirat Al Mulük: Manual of Safavid administration. Persian text in facsimile, Translated and explained by V. Minorsky, London, 1943; J. Woods, *The Aqquyuunlu (clan, confederation, empire)*, p.184.

¹¹² И. П. Петрушевский, *Очерки по истории феодальных отношений в Азербайджане и Армении*, с. 311.

¹¹³ Նույն տեղում, էջ 210:

Արևելյան Այսրկովկասում¹¹⁴: Արեշի գավառի Ալփաուտ գյուղական համայնքում 1886 թ. դրությամբ բնակվում էր մոտ 1500 բնակիչ՝ գրանցված որպես թաթարներ¹¹⁵: Ելիզավետպոլի գավառի Ալփաուտ գյուղում բնակիչների թիվը 1886-ին 231 էր¹¹⁶: Ղազախի գավառում գտնվող Ալփաուտ գյուղական համայնքը միավորում էր 8 գյուղեր և ուներ 812 բնակիչ¹¹⁷: Գյոքչյի գավառում հիշատակված է Աթփաուտ-Մեհթիբեկի գյուղական համայնքը՝ 1549 բնակչով¹¹⁸: Շամախիի գավառի Ալփաուտ գյուղն ուներ 273 բնակիչ և գտնվում էր Մարդան բեկի իշխանության տակ¹¹⁹: Գ. Գեյբուլլաևի հաշվարկով՝ մինչ խորհրդային կարգերի հաստատումը Կովկասում կար Ալփաուտ անունով 11 բնակավայր¹²⁰:

Ահմեդլի ցեղի վերաբերյալ միջնադարյան հիշատակումները սակավ են: Աբու Բաքր Ալ-Թեհրանիի «Քիթաբ-ի Դիյարբաքրիյա» աշխատության մեջ նշվում է, որ Ահմեդլու ցեղի առաջնորդ Ահմադ բեգ Ահմեդլին Ակ-կոյունլու Ուզուն Հասանի ամենահավատարիմ աջակիցներից էր, իսկ Իսկանդեր բեգ Մունշին հաղորդում է, որ 17-րդ դարում Սեֆյանները Ահմեդլու ցեղին բնակեցնում են Ղարաբաղում¹²¹: 19-րդ դ. վերջում հատկապես Ջեբրայիլի գավառում Ահմեդլի անունով բնակավայրերը հաստատում են այս տեղեկությունը (հանդիպում են Քոչ-Ահմեդլի, Փիր-Ահմեդլի գյուղերը և Ահմեդլի գյուղական համայնքը՝ 1500 բնակիչներով)¹²²:

Նույն ժամանակաշրջանում Արևելյան Այսրկովկասում Ահմեդլի կամ Ահմեդլու անունը կրող բազմաթիվ բնակավայրերը վկայում են, որ այս ցեղը տարածված է եղել այդ ամբողջ տարածաշրջանում: Ելիզավետպոլի նահանգի համանուն գավառում հիշատակվում են Ազար-Ահմեդլի և Քյուրդ-Ահմեդլի գյուղերը, համապատասխանաբար՝ 404 և 144 բնակիչներով¹²³: Բաքվի նահանգի նույնանուն գավառում 19-րդ դ. վերջում հիշատակվում է Ահմեդլի գյուղական համայնքը՝ 503

¹¹⁴ Материалы для изучения экономического быта государственных крестьян Закавказского края, т. VII, с. 11, 180. Свод статистических данных о населении Закавказского края, извлечённых из посемейных списков 1886 года, Тифлис, 1893.

¹¹⁵ Свод статистических данных о населении Закавказского края, извлечённых из посемейных списков 1886 года, Арешский уезд, Тифлис, 1893.

¹¹⁶ Свод статистических данных о населении Закавказского края, извлечённых из посемейных списков 1886 года, Елисаветпольский уезд, Тифлис, 1893.

¹¹⁷ Նույն տեղում:

¹¹⁸ Свод статистических данных о населении Закавказского края, извлечённых из посемейных списков 1886 года, Гёкчайский уезд, Тифлис, 1893.

¹¹⁹ Свод статистических данных о населении Закавказского края, извлечённых из посемейных списков 1886 года, Шемахинский уезд, Тифлис, 1893.

¹²⁰ Г. А. Гейбуллаев, Топономия Азербайджана (историко-этнографическое обозрение), с. 30.

¹²¹ J. Woods, The Aqquyuunlu (clan, confederation, empire), p. 184.

¹²² Свод статистических данных о населении Закавказского края, извлечённых из посемейных списков 1886 года, Джебраильский уезд, Тифлис, 1893.

¹²³ Свод статистических данных о населении Закавказского края, извлечённых из посемейных списков 1886 года, Елисаветпольский уезд, Тифлис, 1893.

բնակիչներով¹²⁴: Նահանգի Գյոքչայի գավառում հիշվում է 1127 բնակիչ ունեցող Լալա-Ահմեդլի համայնքը, իսկ Ահմեդլի գյուղի դիմաց նշված է «քոչվորական» բնորոշումը, ինչը նշանակում է, որ նրա 118 բնակիչները դեռ քոչվորական կենսակերպ էին վարում¹²⁵:

Աֆշար ցեղի մասին միջնադարում առաջին անգամ իր «Թյուրքական լեզուների դիվանում» (Dīwānu l-Luġat al-Turk) հիշատակվում է Մահմուդ Կաշգարին, որի մոտ այդ անունն է կրում օղուզական 22 ցեղերից մեկը¹²⁶: Աֆշար ցեղը հանդիպում է նաև Ռաշիդ ադ-Դիսի օղուզական ցեղերի դասակարգման մեջ, որտեղ դրանք 24-ն են¹²⁷:

Աֆշարները Միջին Ասիայից Մերձավոր Արևելք են տեղափոխվել սելջուկյան արշավանքների ժամանակ: 12-րդ դ. առաջին կեսին քոչվոր աֆշար ցեղը բնակվում էր Իրանի Խուզիստան նահանգում¹²⁸: Այնուհետև մոնղոլական արշավանքների շրջանում նրանք տարածվել են Իրանի այլ շրջաններ, այդ թվում և՛ Ատրպատական: Նրանց մի մասը հաստատվել է նաև Փոքր Ասիայում: 14-րդ դարում աֆշարները հիշատակում են որպես Ատրիքի հյուսիսում, մասնավորապես՝ Հալեպի շրջանում հաստատված թուրքմենների մի մասը¹²⁹:

14-15-րդ դարերում աֆշարների որոշ տոհմեր մասնակցել են Կարա-կոյունլուների պետության ստեղծմանը: Իրանում հաստատված աֆշարներն էլ 15-րդ դարում եղել են Ակ-կոյունլուների պետության քաղաքական կյանքում կարևոր դեր խաղացող քոչվոր ցեղերից մեկը: Մանսուր Բեգի գլխավորությամբ նրանք Ակ-կոյունլուների պետության ղեկավար Ուզուն Հասանի հավատարիմ կողմնակիցներն էին: Նրա գլխավորությամբ աֆշարները մասնակցել են թիմուրյանների դեմ մղված Տիգրիսի ճակատամարտին: Նրանք Ուզուն Հասանի բանակի կազմում են եղել Օսմանյան պետության դեմ 1473 թ. տեղի ունեցած Բաշքենդի ճակատամարտում¹³⁰:

Օղուզական այս ցեղը 14-17-րդ դդ. մշտապես ակտիվ մասնակցել է Առաջավոր Ասիայի մահմեդական պետական կազմավորումների քաղաքական կյանքին: Կարա-կոյունլուների և Ակ-կոյունլուների ժամանակաշրջանի ավարտից հետո աֆշար ցեղն արդեն հանդես է գալիս որպես Սեֆյան պետության հենարան ղզլբաշական սկզբնական ու հիմնական ցեղերից մեկը¹³¹: Աֆշար ցեղից էր 1736-1747 թթ. գահակալած Նադիր շահը: Նադիրը աֆշարների Քրրըքլու կամ Քրրըքլի տոհմից էր և

¹²⁴ Свод статистических данных о населении Закавказского края, извлечённых из посемейных списков 1886 года, Бакинский уезд, Тифлис, 1893.

¹²⁵ Свод статистических данных о населении Закавказского края, извлечённых из посемейных списков 1886 года, Гёкчайский уезд, Тифлис, 1893.

¹²⁶ P. Oberling, Afsar, – Encyclopaedia Iranica, I/6, p. 582-586.

¹²⁷ Рашид-ад-Дин, Сборник летописей, т. I, кн. I, с. 89-90.

¹²⁸ F. Sümer, Avşar, - Islam ansiklopedisi, cilt 4, 1988-2013, s.160.

¹²⁹ J. Woods, The Aqquyunlu (clan, confederation, empire), p. 183; F. Sümer, Avşar, - Islam ansiklopedisi, cilt 4, 1988-2013, s. 161.

¹³⁰ J. Woods, The Aqquyunlu (clan, confederation, empire), p. 183.

¹³¹ Tadhkirat Al Mulük: Manual of Safavid administration, p. 14; И. П. Петрушевский, Очерки по истории феодальных отношений в Азербайджане и Армении, с. 48.

սկիզբ դրեց Իրանում Աֆշարների դինաստիային, որը նրա մահից հետո իշխանության դեկին մնաց միայն Խորասանում¹³²:

Ի. Պետրուշևսկու կարծիքով՝ աֆշարների մի մասին Այսրկովկասում բնակեցրել են Թեմուրն ու Միրանշահը: Ժողովրդագետ Մ. Վելիլին նշում է, որ Արևելյան Այսրկովկասում բնակություն է հաստատել Քրրքըը տոհմը, ինչն արտացոլվել է համապատասխան տեղանունների անվանումներում: Ելիզավետպոլի գավառի Քրրքըը գյուղական համայնքի Քրրքըը և Քովար գյուղերում 1886-ին գրանցված էր 2300 բնակիչ¹³³: 19-20-րդ դարեի սահմանագլխին Քրրքըը անունով բնակավայրեր կային Ղուբայի և Ջևաթի գավառներում¹³⁴: 1886 թ. տվյալներով Բաքվի նահանգի Ղուբայի գավառում կար Քրրքըը գյուղական համայնքը՝ 309 բնակչով¹³⁵: Խորհրդային Ադրբեջանի տարածքում Քրրքըը անունով բնակավայրեր են նշվել Խանլարի, Կասում-Իսմայիլովի և Թովուզի շրջաններում: Աղջաբեդիի շրջանի Ուզեյիրիքենդ բնակավայրը նախկինում կոչվում էր Աֆշար: Այս խոշոր ցեղի Գյունեշլի տոհմի անունով բնակավայրեր կան ներկայիս Ադրբեջանի Դիվիչիի և Խաչմասի շրջաններում¹³⁶: Աֆշարների տոհմերից մյուսի՝ Իսալու կամ Ասիլու տոհմի անունով էր կոչվում ներկայիս Ջալիլաբադ քաղաքը¹³⁷:

Ղաջար ցեղը մեծ դեր է ունեցել Իրանի քաղաքական կյանքում: Այս ցեղի ներկայացուցիչ Աղա Մուհամմադ-խան Ղաջարը 1796 թ. Իրանում հիմնադրեց ղաջարների շահական դինաստիան: Ղաջարներն ակտիվ դերակատարություն են ունեցել նաև 16-18-րդ դդ. Այսրկովկասի էթնիկ գործընթացներում, նաև երկրամասի քաղաքական կյանքում: Ա. Բաքիխանովը և Ի. Պետրուշևսկին, հիմնվելով Աբդ ուռ-Ռեզակ Դոմբուլիի «Մասսիրի ի Սուլթանիյե» («Սուլթանների հիշարժան գործերը») 1825 թ. հրատարակված ձեռագրի վրա, ներկայացնում են ղաջար ցեղի ծագման ավանդապատումը: Դրա համաձայն՝ ցեղի անունը ծագել է նրա հիմնադիր Ղաջար իշխանի անունից: Այս ավանդության համաձայն՝ ղաջար ցեղն առաջացել է 2 մոնղոլական՝ ջալայիր և սուլդուր, և 1 տիրեթական՝ թունգութ, ցեղերի բեկորների միացումից¹³⁸: Հայտնի է, որ մոնղոլական արշավանքների շրջանում Հուլաղու խանը ջալայիրների 200 հազար ընտանիքների բնակեցրել էր Պարսկաստանում: Հետագայում Թեմուրը Գանձակում, Ղարաբաղում ու Երևանում բնակեցրեց Փոքր Ասիայից ու Ասորիքից բերված 50 հազար ընտանիքների: Դրանք հիմնականում այն

¹³² И. П. Петрушевский, Очерки по истории феодальных отношений в Азербайджане и Армении, с. 45; А. Бакиханов, Гюлистан-и Ирам, с. 137.

¹³³ Свод статистических данных о населении Закавказского края, извлечённых из посемейных списков 1886 года, Елисаветпольский уезд, Тифлис, 1893.

¹³⁴ М. Велили (Бахарлы), Этнография Азербайджана, <http://ethnoglobus.az/>.

¹³⁵ Свод статистических данных о населении Закавказского края, извлечённых из посемейных списков 1886 года, Кубинский уезд, Тифлис, 1893.

¹³⁶ Г. А. Гейбуллаев, Топономия Азербайджана (историко-этнографическое обозрение), с. 27.

¹³⁷ Նույն տեղում, էջ 28:

¹³⁸ И. П. Петрушевский, Очерки по истории феодальных отношений в Азербайджане и Армении, с. 95; А. Бакиханов, Гюлистан-и Ирам, с. 172.

ղաջարների հետնորդներն էին, որոնք Հուլաղուի օրոք ջալայիրներ անունով բնակեցվել էին Պարսկաստանում և ժամանակ առ ժամանակ անցնում էին Անատոլիա և Ասորիք¹³⁹: Ղաջարները մասամբ Արևելյան Այսրկովկաս են տեղափոխվել նաև Թեմուրի որդի Միրանշահի օրոք¹⁴⁰: Մեկ այլ վարկածով՝ նախահայր Ղաջար Նոյինը եղել է իլխանների դինաստիայից Արդուն խանի աթաբեկը. ըստ այս վարկածի՝ նա նաև Թեմուրի նախահայրն է համարվում¹⁴¹:

Ղաջարների ցեղային հիշողության վրա հիմնված երկու ավանդազրույցների իսկությունն ամբողջությամբ դժվար է հաստատել, սակայն այս պարագայում կարևորն այն է, որ երկու դեպքում էլ Ղաջարների ծագումը կապվում է մոնղոլների հետ: Նրանց հայտնվելը Իրանում Փոքր Ասիայում և Ասորիքում ևս նույնացվում է մոնղոլական արշավանքների հետ: 15-րդ դարում Ղաջարներ եղել են Ակ-կոյունլու ցեղային միության ցեղերից մեկը¹⁴²: Արդեն 16-րդ դարում նրանք հանդես են գալիս որպես Սեֆյան տիրակալների հենարան ղզլբաշական ցեղային միության հիմնադիր 7 (որոշ տարբերակներում՝ 8) ցեղերից մեկը¹⁴³, ապա հիշատակվում Սեֆյան շեյխ Իսմայիլի 7 հազարանոց սկզբնական զորքում, որը նրա զլխավորությամբ 1500 թ. արշավեց Շիրվան¹⁴⁴:

Ղաջարներից էին սերում Երևանի և Գյանջայի (Գանձակի) խաները¹⁴⁵: Գանձակի Ղաջարական Զիյադ օղլի խանական տոհմն իշխեց մինչև ռուսական տիրապետության հաստատումը: Այսրկովկասում Ղաջարների բնակությունից հետո հայտնի է նաև, որ Շահ Աբբասը Գյանջայից տեղահանում և Աստրաբադ է տեղափոխում Ղաջարների 30 հազար ընտանիք¹⁴⁶: Սեֆյանների օրոք Ղաջարներից էին սերում Հայաստանի և Շիրվանի շատ կառավարիչներ ու պաշտոնյաներ, ինչի արդյունքում ղաղստանցիները ընդհուպ մինչև 19-րդ դ. կեսը քամահրաբար Ղաջար էին անվանում Այսրկովկասի բոլոր բնակիչներին¹⁴⁷ (Այսրկովկասի բնակիչներ ասվածն, անշուշտ, վերաբերում է թյուրքալեզուներին):

Արևելյան Այսրկովկասում 19-րդ դ. ոչ այնքան մեծաքանակ Ղաջարների առավել նշանակալի ներկայությունն, ըստ Ա. Բաքիխանովի՝ եղել է Ղուբայի գավառում¹⁴⁸:

¹³⁹ М. Велили (Бахарлы), Этнография Азербайджана, <http://ethnoglobus.az/>; А. Бакиханов, Гюлистан-и Ирам, с. 82-83, 172.

¹⁴⁰ И. П. Петрушевский, Очерки по истории феодальных отношений в Азербайджане и Армении, с. 90.

¹⁴¹ The Cambridge history of Iran, From Nadir Shah to the Islamic Republic, Vol. 7, Cambridge university press, 1991, p. 104.

¹⁴² J. Woods, The Aqquyuunlu (clan, confederation, empire), p. 195.

¹⁴³ Tadhkirat Al Mulük: Manual of Safavid administration, p.194; И. П. Петрушевский, Очерки по истории феодальных отношений в Азербайджане и Армении, с. 90.

¹⁴⁴ The Cambridge history of Iran, From Nadir Shah to the Islamic Republic, Vol. 7, Cambridge university press, 1991, p. 106.

¹⁴⁵ Г. А. Гейбуллаев, Топономия Азербайджана (историко-этнографическое обозрение), с. 29; А. Бакиханов, Гюлистан-и Ирам, с. 82-83, 173.

¹⁴⁶ А. Бакиханов, Гюлистан-и Ирам, с. 173.

¹⁴⁷ А. Бакиханов, Гюлистан-и Ирам, с. 173.

¹⁴⁸ Նույն տեղում, էջ 22:

19-րդ դ. վերջում Բաքվի նահանգի Գյոքչայի գավառում նշվում է Ղաջար գյուղը 36 թաթար բնակիչներով¹⁴⁹: Ղաջար անունով բնակավայր կար նաև նույն նահանգի Ղուբայի գավառում՝ 72 բնակիչներով¹⁵⁰: Ուշագրավ է, որ Շամախիի գավառում հիշատակվող Ղաջար գյուղի բոլոր 225 բնակիչները եղել են հայեր¹⁵¹: Զալայի անունով բնակավայր հիշատակվում է Զաքաթալայի օկրուգում, որի 204 բնակիչներից 190-ը թաթարներ էին, 14-ը՝ ավարներ¹⁵²:

Խալաջ ցեղին հանդիպում ենք 13-րդ դ. պատմիչ Ռաշիդ ադ- Դինի մոտ: Ներկայացնելով առասպելական Օղուզ խանից սերված 24 օղուզական ցեղերը՝ նա հիշատակում է նաև նրան միացած եղբայրներին ու զարմիկներին, որոնցից յուրաքանչյուրի անունով մեզ հայտնի են թյուրքական ցեղեր: Պատմիչը մասնավորապես հիշատակում է ույղուր, քանլը, դըփչադ, կարլուկ, աղաչերի ցեղերին և մեզ հետաքրքրող խալաջը¹⁵³: Օղուզական ավանդապատումից կարելի է ենթադրել, որ այդ ցեղը կամ ժողովուրդն ուներ թյուրքական ծագում և միացել էր օղուզներին մինչև նրանց արշավանքները դեպի արևմուտք: Ռաշիդ ադ- Դինը շարադրում է նաև օղուզական Խալաջ ցեղի ծագման ավանդապատումը: Դրա համաձայն՝ Օղուզ խանը գրավում է Սպահանը, այնուհետև ցանկանում վերադառնալ: Ճանապարհին մի կին երեխա է ունենում: Երեխան սնունդի բացակայության պատճառով քաղցած է մնում: Կնոջ ամուսինը սկսում է որսով զբաղվել և հետ է մնում Օղուզ խանի մարդկանցից: Խանը զայրանում է և դիմում նրան՝ քալ աչ (թյուրքական լեզուներով՝ մնա՛ քաղցած): Այստեղից այդ մարդու տոհմը ստացել է Քալաջ կամ Խալաջ անունը¹⁵⁴:

Խալաջների մասին հաղորդում ունի նաև 13-րդ դ. արաբ պատմիչ Իզ ադ- Դին իբն ալ-Ասիրը: Ըստ նրա՝ Մահմուդ Ղազնևին 1005 թ. իր կողմն է գրավում խալաջական թյուրքերին, որոնց հետ շարժվում է Բալխի վրա¹⁵⁵: Արաբ պատմիչը հիշատակում է նաև Խորեզմշահ Ջելալ ադ-Դին Մանկբուռնայի ամիրաներից մեկին, որը սերում էր խալաջ-թյուրքերից¹⁵⁶:

Միջնադարում խալաջները մեծ դեր են խաղացել Միջին Ասիայի, Աֆղանստանի և Հնդկաստանի քաղաքական կյանքում: 11-րդ դ. սելջուկյան արշավանքների շրջանում խալաջների մի մասը տեղափոխվել է Իրան և Առաջավոր Ասիա: Չնայած

¹⁴⁹ Свод статистических данных о населении Закавказского края, извлечённых из посемейных списков 1886 года, Гёкчайский уезд, Тифлис, 1893.

¹⁵⁰ Свод статистических данных о населении Закавказского края, извлечённых из посемейных списков 1886 года, Кубинский уезд, Тифлис, 1893.

¹⁵¹ Свод статистических данных о населении Закавказского края, извлечённых из посемейных списков 1886 года, Шемахинский уезд, Тифлис, 1893.

¹⁵² Свод статистических данных о населении Закавказского края, извлечённых из посемейных списков 1886 года, Закатальский округ, Тифлис, 1893.

¹⁵³ Рашид ад Дин, Сборник летописей, т. I, кн. I, с. 76.

¹⁵⁴ Նույն տեղում, էջ 85:

¹⁵⁵ Ибн ал-Асир, Ал-каmil фи-т-та'рих (Полный свод истории), Ташкент-Цюрих, 2005, с. 179.

¹⁵⁶ Նույն տեղում, էջ 378:

իրենց զգալի թվին՝ խալաջները վերջնականապես ձևավորված ցեղային գիտակցություն չեն ունեցել¹⁵⁷:

Նրանք հանդես չեն եկել որպես քաղաքական ինքնուրույն միավոր, ինչպես, օր.՝ ղզլբաշական ցեղերը, կամ Ակ-կոյունլուների դաշինքի մաս կազմող թուրքմենական ցեղերը: Խալաջները հիմնականում ընկալվել են որպես իսլամադավան տիրակալների, ամիրաների (էմիրների) վարձկան զինվորական ուժեր: Մոնղոլական արշավանքների շրջանում խալաջները խորեզմշահերի դաշնակիցներն էին, և մոնղոլների հաղթական արշավանքների ճնշման տակ նրանց մի մասը ևս տեղափոխվել է Իրան, այստեղից՝ նաև Այսրկովկաս¹⁵⁸:

17-րդ դարում ճանապարհորդները խալաջներին հիշատակում են որպես Մուղանի դաշտի բնակիչներ¹⁵⁹: Արևելյան Այսրկովկասում 19-րդ դ. վերջին պահպանվել էին Խալաջ անվան հետ կապված բազմաթիվ տեղանուններ¹⁶⁰: 1886թ. Այսրկովկասի վիճակագրական տվյալներում Բաքվի նահանգի Գյոքչայի գավառում նշված է Խալաջ գյուղը՝ 544 բնակիչներով, որոնք գրանցված են որպես թաթարներ¹⁶¹: Խալաջ անունով ավելի մարդաշատ 2 գյուղեր՝ 1617 և 1190 բնակչով, հանդիպում ենք նաև Ջևաթի գավառում¹⁶²: Ընդ որում՝ դրանցից մեկի թաթար բնակչությունը ներկայացված է որպես քոչվոր: Բաքվի նահանգի Ղուբայի գավառում հիշատակում էր Խալաջ գյուղը 636 բնակչով¹⁶³: Լենքորանի գավառում հանդիպում ենք Խալաջիլու գյուղը 517 բնակչով¹⁶⁴:

Այսպիսով՝ պատմական Առանի և Շիրվանի տարածքն ընդգրկող Արևելյան Այսրկովկասում թուրքական տարրը մեծ ծավալով հայտնվել է սկսած 11-րդ դարի սելջուկյան արշավանքներից: Այս ալիքը նոր թափ է ստացել 13-րդ դարի մոնղոլական արշավանքների ընթացքում: Սակայն երկրամասում թուրքական տարրի ամենածավալուն ներկայությունն ու քաղաքական ադդեցությունը ուժեղացել է սկսած 14-15-րդ դարերից, երբ տարածաշրջանը գտնվում էր Կարա-կոյունլու, այնուհետև Ակ-կոյունլու թուրքմենական պետությունների տիրապետության տակ: Այս շրջանում տվյալ երկու ցեղային համադաշնությունների թուրքական շատ քոչվոր ցեղեր

¹⁵⁷ Kalaj, Tribe originating from Turkistan. Generally referred to as Turks but possibly IndoIranian, - Encyclopaedia Iranica, Vol. XV, Fasc. 4, p. 363-364.

¹⁵⁸ E. Konukçu, Halaç, – Islam ansiklopedisi, 1988-2013, cilt 15, s. 229.

¹⁵⁹ Г. А. Гейбуллаев, Топонимия Азербайджана (историко-этнографическое обозрение), с. 28; Kalaj, Tribe originating from Turkistan, p. 363-364.

¹⁶⁰ Г. Д. Агаев, Данные этнотопонимии о расселении тюркоязычных племён в Азербайджане XI-XV вв., – Этническая ономастика, Москва, 1984, с. 143.

¹⁶¹ Свод статистических данных о населении Закавказского края, извлечённых из посемейных списков 1886 года, Гёкчайский уезд, Тифлис, 1893.

¹⁶² Свод статистических данных о населении Закавказского края, извлечённых из посемейных списков 1886 года, Джеватский уезд, Тифлис, 1893.

¹⁶³ Свод статистических данных о населении Закавказского края, извлечённых из посемейных списков 1886 года, Кубинский уезд, Тифлис, 1893.

¹⁶⁴ Свод статистических данных о населении Закавказского края, извлечённых из посемейных списков 1886 года, Ленкоранский уезд, Тифлис, 1893.

բնակություն հաստատեցին Արևելյան Այսրկովկասում: Իսկ գործընթացն իր գագաթնակետին հասավ արդեն թուրքմենական երկու պետություններին հաջորդած Մեֆյան Իրանի տիրապետության շրջանում՝ 16-17-րդ դարերում, երբ Մուղանի դաշտը գրեթե ամբողջությամբ, նաև Շիրվանի զգալի տարածքներ բնակության տրվեցին նախկին Ակ-կոյունլու և Կարա-կոյունլու ցեղային համադաշնությունների մեջ մտած, այնուհետև ղզլբաշների կազմը համալրած քոչվոր ցեղերին:

Ուսումնասիրելով Արևելյան Այսրկովկասում թուրքական ցեղերի բնակության դինամիկան՝ կարելի է արձանագրել մի հետաքրքիր օրինաչափություն: Քոչվոր ցեղերի մեծ մասը, եկած լինեն սելջուկյան, մոնղոլական արշավանքների, թե ավելի ուշ շրջանում, անցել են նախ՝ Ատրպատական և վերջապես՝ Արևելյան Այսրկովկաս: Այս տեղաշարժն առակ է եղել Թեքելյու, Շամլու, Բայաթ, Աֆշար և բազմաթիվ այլ ցեղերի դեպքում: Ընդ որում՝ քոչվոր ցեղերի նման տեղաշարժերի ժամանակ ցեղն ամբողջությամբ չի տեղափոխվել, այլ միայն՝ դրա մի մասը: Թերևս, դրանով է պայմանավորված Արևելյան Այսրկովկասի և Իրանական Ատրպատականի, մասամբ նաև Թուրքիայի թուրքական ծագմամբ բնակչության որոշակի էթնիկ ընդհանրությունը և միևնույն ցեղերի անուններով բնակավայրերի առկայությունը: